




Frammøte kunne vore betre, men dei som var der, synte stor interesse med gode spørsmål og innlegg.

Vindkraftutbygging fører til store verditap av eigendom. Hus og eigedom til 4 mill. kr. i nærleiken av vindturbinar i Tysvær hadde eit verditap på 2 mill. kr. Utbyggjar tek pant i eigendomen. Utdrag frå Grunnboka syner at gardsbruk er pantsett der det i dag pågår større utbyggingar. Dette er berre noko av det som kom fram på ope møte i Uskedalen i går kveld. Det var dårleg frammøte frå dei som eigenleg var målgruppa, nemleg grunneigarar, hytteeigarar, grunneigar- og utmarkslag, hjortejegerar og andre med interesse i friluftsliv. Det var likevel eit godt og konstruktivt møte med mange spørsmål og innlegg frå salen.

Det var organisasjonen Nei til vindmøller i Kvinnherad v/ Marit Varanes og Annemor Ekeland som inviterte til møte i Uskedalen. Føredraget med tittelen Medaljens bakside fekk fram det som løyner seg bak med forhandlingar, avtalar og underskrifter med grunneigarar, ofte i lukka rom utan at allmenheten er informert.

Ei vindmølle har ei levetid på 15 - 20 år. Sjølv om utbyggjar har fjerningsplikt, er det ofte uklart om det vert gjort. Utanlands kapitalkrefter står bak 80 % av vindkraftprosjekta i Noreg. Det let seg gjera i ei tid der Regjeringa står fram med såkalla grønne sertifikat.



Kartet syner område NVE definerer som godt eigna for vindkraftutbygging.

Marit Varanes valde å flytta heim til Kvinnherad. Natur- og kulturverdiane med vakker natur, turområde og eit rikt dyre- og fugleliv var avgjerande for dette valet. Kven flyttar til ei bygd der du møter vindkraft med sprengingar, vegar, 250 meter høge vindturbinar og store inngrep i landskapet, spurde ho.

NVE har definert store område i Kvinnherad godt eigna for vindkraft. Regjeringa skrota Nasjonal ramme. Det er ikkje det same som at det ikkje kan bli utbygging i Kvinnherad.

Arrangøren var godt nøgd med møte, særleg for stort engasjement med gode spørsmål og merknader. Aksjonsgruppa i Kvinnherad jobbar for at nei til vindkraft skal koma klart fram i Kommuneplanen, både i tekstdelen og i arealdelen.

Tekst/foto/nett: Kristian Bringedal